

Tapiissutitalimmik illulianik iluarsaassinermut, pitsangorsaanermut alliliinermullu tapiisarneq pillugu Namminersorlutik Oqartussat nalunaarutaat

Illuliortiternernut aningaasalersuineq pillugu Inatsisartut inatsisaanni nr. 39, 23. november 2017, § 24b, imm. 4 kingusinnerusukkut Inatsisartut inatsisaatigut nr. 36-kkut, 28. november 2019-imeersukkut allannguuteqartinneqartoq naapertorlugu aalajangersarneqarput:

Kapitali 1

Tapiissutit

§ 1. Kommunalbestyrelsi tapiissutitalimmik illuliat inuulluataarniutitaqanngitsunik aammalu atortulersuutit atorneqartut nalinginnaasut atorlugit iluarsaannissaannut, pitsangorsarnissaannut allineqarnissaannulluunniit tapiissuteqarsinnaavoq. Tapiissutit pilersaarusrornermut, nakkutiliinermut, atortussanik pisinermut sanasunullu aningaasartuutinut atugassatut tunniunneqarsinnaapput.

Imm. 2. Tapiissutit iluarsaanneqarnissamut, pitsanguinissamut allilerinissamulluunniit, taamaalillunilu inissiap aallaqqammut pitsaassuserisaata atuutsiinnarniarneranut, aammalu inissiap maanna pitsaassuserisaanut atorsinnaassusianullu naleqqunnissaanut iluaqtaasumik tapiissuteqartoqarsinnaavoq.

Imm. 3. Inissianut ukiumi qinnuteqarfiusumi februaarip ulluisa aallaqqataat ukiut 20-t inorlugit sioqqullugu sananeqarsimasunut atorneqalersimasunullu, inissianik iluarsaassiniissamut, pitsangorsaanissamut alliliinissamullu tapiissuteqartoqarsinnaanngilaq.

§ 2. Kommunalbestyrelsi ukiumut aningaasaliiffiusumut missingersuutini, kommunalbestyrelsimit akuerineqarsimasuni tapiissutissanut aningaasaliissutissanik immikkoortitsissaaq. Ukiumut aningaasaliiffiusumut aningaasaliissutissat, kommunalbestyrelsip akuerisaasa iluanni aningaasaliissutinit tapiissutissanik neriorsuuteqartoqarsinnaavoq.

§ 3. Kommunalbestyrelsip tapiissutissatut aningaasaliissutaannit minnerpaamik 50 %-it qalissiat, silami iikkat, oqorsaatit kiisalu imermut, kiassarnermut kuuffeqarnermullu atortulersuutit atorlugit iluarsaassiniissamut pitsangorsaanissamullu tapiissutinik qinnuteqaatinut atorneqassapput, taamaattorlitak. imm. 2. Aningaasaliissutit sinneri iluarsaassiniissamut, pitsangorsaanissamut alliliinissamullu tapiissutinik qinnuteqaatinut allanut atorneqassapput.

Imm. 2. Qalissiat, silami iikkat, oqorsaatit kiisalu imermut, kiassarnermut kuuffeqarnermullu atortulersuutit atorlugit iluarsaassiniissamut pitsangorsaanissamullu tapiissutinik qinnuteqaatit

naammattut tiguneqarsimanngippata, aningaasaliissutit sinneri iluarsaassinissamut, pitsangorsaanissamut alliliinissamulluunniit qinnuteqaatinut allanut atorneqarsinnaapput.

Kapitali 2

Qinnuteqaatit tapiiffisineqarnissamullu neriorsuutit

§ 4. Inissianik iluarsaassinissamut, pitsangorsaanissamut alliliinissamulluunniit tapiiffigineqarnissamik qinnuteqaatit allaganngorlugit kommunimi illup inisisimaffigisaani kommunalbestyrelsimit nassiunneqassapput.

§ 5. Ukumi aningaasaliiffiusumi februaarip ulluisa aallaqqaataat tapiiffigineqarnissamik qinnuteqaateqarnissamut killigitinneqarpoq. Qinnuteqaatit tiguneqartut ataatsimoortillugit kommunalbestyrelsimit suliarineqassapput tulleriaarneqassallutilu. Killigititaasup qaangiutereernerani qinnuteqaatit itigartinneqassapput, taamaattorli tak. imm. 2-3.

Imm. 2. Tapiiffigineqarnissamik qinnuteqaatit, ukumi aningaasaliiffiusumi februaarip ulluisa aallaqqaataata kingorna tiguneqartut tiguneqarnerisa tulleriinneri malillugit, aammalu aningaasaliissutissat missingersuutinut, kommunalbestyrelsip akuerisaannut ilaatinneqarsimappata suliarineqarsinnaapput.

Imm. 3. Qinnuteqaatit, ukumi aningaasaliiffiusumi februaarip ulluisa aallaqqaataata kingorna tiguneqartut, qaliap imaluunniit silami iikkat ussiillismappata, imaluunniit imermut, kiassarnermut kuuffeqarfimmullu atortulersuutit ajutoorfiusimappata tassanngaannartumik pitsangorsaanissamut iluarsaassinissamulluunniit tunngasut suliarineqarsinnaapput, aningaasaliissutissat missingersuutinut, kommunalbestyrelsip akuerisaanuit ilaatinneqarsimappata.

§ 6. Tapiiffigineqarnissamut qinnuteqaammut ilanngunneqassapput:

- 1) Iluarsaassinissamut, pitsangorsaanissamut alliliinissamulluunniit kissaatigisamut nassuaat.
- 2) Inissiaq pillugu nassuaat, tassunga B-nr., pisoqaassusia, angissusia pitsaassusialu.
- 3) § 7 naapertorlugu suliassamut aningaasartuutissanut tamarmiusunut missingiut neqeroorulluunniit.
- 4) Kommunalbestyrelsimit nunaminertamut inniminniineq imaluunniit nunaminertamik atugassiineq, suliassami pineqartumi nunaminertamik atugassinneqarnissaq pisariaqartinneqarpat.
- 5) Nammineerluni aningaasaliissuteqartoqassappat tassunga uppernarsaat.
- 6) Qinnuteqartup inoquatasalut najugaqarfiannut uppernarsaat.
- 7) Ukiuni akileraarfiusuni marlunni kingullerni qinnuteqartup inoquatasalut akissarsiaasa naatsorsorneri.
- 8) Qinnuteqartup inoquatasalut qaammatinut pingasunut kingullernut akissarsiaasa allagartaat.
- 9) Sillimmasiinermut atuuttumut akiliisimanermut uppernarsaat.

Imm. 2. Kommunalbestyrelsip qinnuteqartoq peqqusinnaavaa, paassisutissanik uppernarsaatinillu, tapiiffigineqarnissamut qinnuteqaatip suliarineqarneranut atugassanik nassiussequllugu. Qinnuteqartoq paassisutissanik uppernarsaatissanillu, qaammatisiutit malillugit 14-init ikinnerunngitsunik piffissaliinerup iluani nassiussimanngippat, kommunalbestyrelsi tapiiffigineqarnissamut qinnuteqaammut itigartitsisinnaavoq.

Imm. 3. Tapiiffigineqarnissamut qinnuteqarnermi qinnuteqarnermut immersugassaq, kommunalbestyrelsimit akuerineqartoq atorneqassasoq kommunalbestyrelsi aalajangiisinjaavoq.

§ 7. Suliassami aningaasartutissanut tamarmiusunut missingersuutit imaluunniit neqeroorut sanaartornermik ilisimasalimmit suliarineqarsimassaaq, aammalut tassani pilersaarusiorneq nakkutilliinerlu, atortussat pisiassat sanasunullu aningaasartutissat immikkoortiterneqarsimassapput.

§ 8. Kommunalbestyrelsi neriorsuummik nalunaaruteqannginnermini, uku pillugit INI A/S-ip oqaaseqaataanik pissarsiniassaaq:

- 1) ukiumi qinnuteqarfiusumi februaarip ulluisa aallaqqaataat sioqqullugu qaammatit 60-it kingulliit iluanni inissami, tapiissuteqartoqarnissaanik qinnuteqaateqarfiusumi iluarsaassinermut, pitsangorsaanermut alliliinermulluunniit Namminersorlutik Oqartussanit tapiisoqarsimanersoq, aamma
- 2) inissami maanna piginnittooq taarsigassarsisoralugu Namminersorlutik Oqartussanit taarsigassarsianik ingerlasoqarnersoq imaluunniit naammassereersunik taarsigassarsisoqarsimanersoq.

§ 9. Kommunalbestyrelsi Kalaallit Nunaanni Eqqartuussivimmi nalunaarsuinermut allattaaviup naqinneranik, qinnuteqartup inissiamik atusinnaatitaaneranut upernarsaatissamik pissarsiniassaaq.

§ 10. Kommunalbestyrelsip pisariaqartitsineq malillugu sumiiffimmi tapiiffigineqarnissamut qinnuteqaateqarfiusumi inissiaq qularnaveeqqusiullugu aningaasaateqarfimmit imaluunniit realkredit-imit taarsigassarsisoqarsinnaanersoq pillugu, tamanut atuuttussamik Grønlandsbanken A/S aamma Bank Nordik oqaaseqartissavai.

§ 11. Tapiiffigineqarnissamut qinnuteqaat communalbestyrelsimit akuerineqarpat, tapiissuteqarnissamut neriorsuut nalunaarutigineqassaaq. Tapiissuteqarnissamut nalunaarummi suliassat suut neriorsuummi pineqarnersut aningaasartassaasalu amerlassusii allanneqassapput.

Imm. 2. Tapiissuteqarnissamut neriorsuummi pilersaarusiornermut nakkutilliinermullu, atortunut pisiassanut aamma sanasunut aningaasartutissanut tapiissutissat immikkoortiterneqassapput. Suut tapiiffigineqartussatut neriorsuuteqarfigineqassanersut aammalut aningaasartassaat qanoq amerlatigissanersut pillugu communalbestyrelsi aalajangiissaq.

Imm. 3. Tapiissutissamut inaarutaasumut akilerneqartussamut suliassat allat ilaatinneqarsinnaanngillat, imaluunniit aningaassat tapiiffigineqarnissamut neriorsuummi aningaasartaliussanit qaffasinnerusinnaanngillat. Aningaasartuutaanerusussat inissiamik, tapiissuteqarnissamut qinnuteqarfiusumik piginnittumit akilerneqassapput.

§ 12. Suliassat tapiissuteqarnissamut neriorsuummi pineqartut ukiumi aningaasaliiffiusumi aallartinneqarsimassapput naammassineqarsimassallutillu. Taamaaanngippat tapiissuteqarnissamut neriorsuut siumut ilisimatitsinertaqanngitsumik atorunnaassaaq.

Imm. 2. Kommunalbestyrelsi pisuni immikkut ittuni piffissaliussamik saneqqutsinissamut immikkut ittumik akuersissuteqarsinnaavoq. Pissutsit immikkut ittut tassaasinnaapput atortussanik atorneqartussanik tunniussinngitsoorneq imaluunniit tunniussinissamut kinguaattoorneq, suliassap annertussusia assigisaaluunniit. Allatorneqartut tamakkiisumik matussusiinngillat.

Kapitali 3

Tapiissutinik akiliisarneq

§ 13. Qinnuteqartoq sanasumut imaluunniit sanasunut suliaqartuusunut aningaaserivimmiit akiliinermut uppernarsaatinik, akiligassiissutip normuanik innersuussiviusumik ilanngussisimangippat, tapiissutissat sanasumut imaluunniit sanasunut suliaqartuusunut akilerneqassapput.

Imm. 2. Tapiissut akilerneqarnissaannut qinnuteqaat sanaartornermut naatsorsuutinut ilanngunneqassaaq, tassanilu suliat, neriorsummut atasut immikkoortiterneqassapput, aammalu sanasumit imaluunniit sanasunit suliaqartuusunit uppernarsarneqassallutik.

Kapitali 4

Atuutilerfia aamma ikaarsaarnermut aalajangersakkat

§ 14. Nalunaarut manna 1. december 2020-mi atuutilerpoq.

Imm. 2. Nalunaarut piffissami atuutsitsilerfiusumi tapiiffigineqarnissamut qinnuteqaatinut ingerlasunut, sulilu aalajangiiffigineqanngitsunut atuuppoq.

Imm. 3. Kommunalbestyrelsi pisariaqartillugu tapiiffigineqarnissamut qinnuteqaatini ingerlasuni, kommunalbestyrelsi qinnuteqaammik suliaqarsinnaassappat paasissutissat uppernarsaatissalluunniit amigaataasinnaasut pillugit qinnuteqartumut ilitsersuisassaaq.

Namminersorlutik Oqartussat, ulloq 11. november 2020

Karl Frederik Danielsen

/

Ruth Lindhardt

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut